

DAP tidak kata gugur agama pada Mykad

KONTROVERSI kononnya senator DAP Nga Hock Cheh mencadangkan status agama pada MyKad perlu digugurkan telah disalah petik.

Menurut Hock Cheh, ucapannya di Dewan Negara tidak pernah membayangkan mengenai pengguguran status agama seseorang daripada MyKad, sebaliknya menekankan mengenai pentingnya identiti nasional.

Menurut hamsard ucapannya di Dewan Negara pada 24 April lalu, senator itu berkata:

“Antara contoh, seorang bayi apabila dia dilahirkan, dia diberikan identiti mengikut kaum. Dia tidak diberikan identiti nasional. Kalau boleh dari sejak kecil, dia mengangap sendiri sebagai seorang warganegara Malaysia. He sees himself as a Malaysian. Isu perkauman tidak akan timbul”.

Dalam satu kenyataan yang dikeluarkan medianya, Hock Cheh berkata, senator dari Umno Megat Zulkarnain yang tidak hadir semasa ucapan itu dibuat telah memetik secara salah kenyataan beliau.

Beliau mendakwa beberapa organisasi media seperti Utusan Malaysia dan Bernama juga telah melaporkan ucapannya secara salah.

“Penekanan saya adalah identiti kewarganegaraan dan bukan melalui bangsa. Saya tidak membuat sebarang kenyataan mengenai agama. Saya juga tidak membuat sebarang cadangan bahawa agama digugurkan seperti yang didakwa orang lain.

“Adalah malang cadangan saya untuk mempromosikan perpaduan negara telah disalah petik dan diputarakan oleh pihak tertentu untuk mendapatkan keuntungan politik dengan mengabaikan kebenaran dan martabat Dewan Negara serta kepentingan negara.

“Saya harap pihak berkaitan yang telah melaporkan secara salah ucapan supaya supaya melakukan pembetulan yang perlu, “katanya.

Dalam perkembangan lain, mengenai cadangan beliau agar Malaysia membuka kedutaan di Israel, Nga berkata beliau telah memohon maaf dan menarik balik kenyataannya itu.

Bagaimanapun, senator itu mendakwa cadangan tersebut dibuat dengan tujuan untuk mengekalkan keamanan di Timur Tengah.

“Dengan tujuan membantu Palestin mencapai keamanan, niat saya adalah untuk mencadangkan perubahan dalam pendekatan negara kita sekarang, dengan harapan dapat menandatangani perjanjian damai antara Palestin dan Israel.

“Bagaimanapun, mendedahkan sensitiviti mengenai perkara ini dan untuk mengelakkan kesalahan dan salah faham, saya dengan ikhlas dan secara sukarela memohon maaf semasa memberikan penjelasan di Dewan Negara pada 25 April dan ingin menarik balik kenyataan itu serta merta,” katanya.